

八瓊室金石補正

第五十冊

八瓊室金石補正卷一百七

太倉陸增祥撰

男 繼輝校錄

吳興劉承幹覆校

重刻宸奎閣碑銘

高七尺八寸廣四尺二寸十七行行四十二字字徑一寸五分正書橫額題宸奎閣碑銘五篆字在鄞縣皇祐中有詔廬山僧懷璉住京師十方淨因禪院召對化成殿問佛法大意奏對稱旨賜號大覺禪師是時北方之爲佛者皆留於名相囿於因果以故士之聰明超逸者皆鄙其言詆爲蠻夷下俚之說璉獨指其妙與孔老合者其言文而眞其行峻而通故一時

士大夫喜從之游遇休沐日璉未盥漱而戶外之屨滿矣

仁宗以天縱之能不由師傳自然得道與璉問答親書頌詩以賜之凡十有七篇至和中上書乞歸老山中上曰山即如體也將安歸乎不許治平中再乞堅甚

英宗留之不可賜詔許自便璉旣渡江少留於金山西湖遂歸老於四明之阿育王山廣利寺四明之人相與出力建大閣藏所賜頌詩榜之曰宸奎時京師始建寶文閣詔取其副本藏焉且命歲度僧一人璉歸

山二十有三年 八十有三臣出守杭州其徒使來
告曰宸奎閣未有銘君逮事昭陵而與吾師遊最舊
其可以辭臣謹案古之人君號知佛者必曰漢明梁
武其徒蓋常以藉口而繪其像於壁者漢明以察爲
明而梁武以弱爲仁皆緣名失實去佛遠甚恭惟

仁宗在位四十二年未嘗廣度尼僧崇侈寺廟干戈斧
質未嘗有所私貸而升遐之日天下歸仁焉此所謂
得佛心法者古今一人而已璉雖以出世法度人而
持律嚴甚上嘗賜以龍腦鉢孟璉對使者焚之曰吾
法以壞色衣以瓦鐵食此鉢非法器使者歸奏上嘉

歎久之銘曰巍

仁皇體合自然神曜得道非有師傳維道人璉逍遙自
在禪律並行不相留礙於穆頌詩我既其文惟佛與
佛乃識其真咨尔東南山君海王時節來朝以謹其
歲

元祐六年正月癸亥龍圖閣學士左朝奉郎知杭州
軍州事兼管內勸農使充兩浙西路兵馬鈐轄兼提
舉本路兵馬巡檢公事武功縣開國子食邑六百戶
輕車都尉賜紫金魚袋臣蘇軾撰并書

四明阿育王寺故有宸奎閣不知燬自何年寺西

折數十武卽妙喜泉相傳沈碑在焉余抵四明命
僧索之水中乃得唐范的書常住田碑一通其陰
則有宋張無垢撰妙喜泉銘數百年舊迹一旦軒
露良亦有數哉後從范東明司馬譚及蘇長公閣
記司馬家藏有長公舊刻余爲欣然命林生芝雙
鉤入石以補阿育闕典長公書流播甚多獨此筆
法遒勁有歐顏風故願與海內操觚者共寶焉萬
厯乙酉冬孟郡守溫陵蔡貴易識

右碑篆額五字文正書十七行行四十二字後有明
人行書跋語三行在鄞縣閣在縣五十里文忠書當

時已爲拱壁大書深刻不致湮沒此必黨禁時滅跡

或沈埋別所而東明司馬所藏其或宋拓歟

兩浙金石志

焦山題刻五段

在丹徒

米芾題名

高一尺七寸四分廣二尺四行
行四字字徑三寸許正書左行

仲宣法芝米芾元祐辛未孟夏觀山樵書

陸務觀等題名

高三尺七寸七分廣六尺三寸三分十二
行行六字後二行行八字七字正書

陸務觀何德器張玉仲韓無咎隆興甲申閏月廿九日

踏雪觀塵鶴銘置酒上方烽火未息望風檣戰艦在煙

靄間慨然盡醉薄晚泛舟自甘露寺以歸

明年二月壬午園禪師刻之石務觀書

吳琚詩

高三尺六寸五分廣三尺五寸三分十行
行十一字至十四字不等字徑二寸行書

□愛山□□今踏山堆路江□□事動□聊皆可賦榮

确石徑微白浪灑衣履臨淵魚龍驚捫崖猿鳥懼古刻

難細讀斷缺蒼蘚護歲月豈易考書法但增慕摩挲復

三歎欲去還小住習氣未掃除齒髮恨遲暮華亭鶴自

歸長江只東注寂寥千古音□日起烟霧清熙甲辰上

元前三日遊焦山觀瘞鶴銘有作延陵吳琚

張孝思重

下泐

右吳琚詩甲辰爲清熙十一年案吳琚吳益之子

憲聖后姪也乾道九年通判臨安府歷尙書郎鎮

安軍節度使復以才選除知明州兼沿海制置使
甯宗初乞祠尋知鄂州再知慶元府位至少師判
建康府兼留守又嘗使金金言南使中惟吳琚言
可信此詩殆道經所題莫定其時何職也琚之父
益與其弟蓋皆有書名琚蓋習其家學者後有張
孝思重四小字疑此詩爲後來重刻者而上下均
已泐矣

吳琚書心經殘字

拓本高處存四尺廣二尺三行
共十六字字徑四五寸行書

聲香味觸

界無無明亦無無明

無苦集滅

宋人吳琚書心經焦山志略琚書心經石刻一片僧
明湛移置松寥閣只存此殘字下載八行存江中石
上可識者只十三字又琚敬書共十六字同治己巳
游焦山拓此江中存字不及拓矣字與張卽之相近
筆勢迢拔可寶

楊翰記

右殘字及詩皆海琴所贈

王濬等題名

二行行八字
七字正書

嘉熙二年十一月晦王濬季夢得韓□

右刻在陸務觀題名石上此拓疑未全

唐顏文忠公新廟記

高六尺六寸廣三尺三寸三十行行五十三字字徑六分正書篆額五行題唐魯郡顏文忠公新廟記十字在費縣

唐魯郡顏文忠公新廟記

左承議郎尙書職方員外郎雲騎尉賜緋魚袋曹輔撰

明州定海縣主簿秘書省校對黃本書籍秦觀書

左宣德郎知開封府雍邱同簽書兵馬司公事鄧祐篆額

唐魯郡顏文忠公有廟在郎邪之費距縣治東北五十

里曰諸滿村室宇庫陋歲月將圯祀典弗著神不願享
元祐六年洪農楊君元永為邑之二年也建言于州曰
按祭法飡饗大菑飡捍大患則祀之以勞之國以死勤
事則祀之方魯公守平原時祿山逆狀未萌公能隲其
端及反河朔盡陷獨平原城守具備與其從兄常山太
守杲卿首倡大順河北諸郡倚之以為金城可謂飡捍
大患矣其後為姦臣所擠臨大節挺然不屈竟殞賊手
可謂以死勤事矣今廟宇不能芘風雨顛聞諸
朝少加崇葺俾有司得歲時奉祠知軍州事安定梁侯
彥深下車未久起廢更弊州既以治睹是舉也而樂之

卽具以聞太常議典禮以上春官氏曰宜如請公之遠祖青徐二州刺史盛始自魯居於琅邪之臨沂孝悌里故今子孫之在琅邪者衆其十一世孫安上者言縣謂廟地僻左荒棘跨嶺谷絕河澗者六七而後至祈自出緡錢買地祊河之東以徙置之庶幾子子孫孫與其邦人奔走承祀弗懈是年十二月二十四日廟成楊君以書抵京師曰史氏稱顏公英烈言言如嚴霜烈日可畏而仰其信然今廟碑將立無文以刻之懼不足以表忠義勸來世夫子其毋辭焉余孝顏氏蓋出於邾武公之後武公字顏其子友別封邾爲小邾子遂以顏爲氏孔

子之門人達者七十有二而顏氏有其八回以殆庶幾
得復之初九不遠復無祇悔之義以爲門人之冠其後
衣冠不絕間出聞人然則公之知義明信道篤其淵源
有自來矣夫人之於死生之變亦大矣而君子處之裕
然得其所者蓋有以權其義之輕重而已若夫義有重
於生則不必幸其生生有重於義則不必致其死故曰
非死之難處死之難若魯公者學行內外充衍閎肆以
發見於事業非獨一時奮不顧死以取名故前抗祿山
之師後拒希烈之命不惑於死生之際而以明君臣之
大義可謂真知輕重大丈夫者哉百世之下聞其風者

雖亂臣逆夫將消縮摧沮不復牙孽於其心矣楊君欲
發明公之義烈以詔後世不諉於文學之士而猥以見
屬豈以余爲知言哉乃爲志其事而系之以銘銘曰

屹屹魯公 剛實積中 學奧問博 涵演擴充 孝

友施家 發爲公忠 直道以行 孰顧我躬 讒口

戮猶 往齒其鋒 祿山一呼 逆焰熾天 炎于崑

岡 沸于百川 杯水輿薪 勢且莫抗 屹屹魯公

忠誠是仗 大義凜然 奮裾首倡 一清土門

數斬僞將 十有七州 同風順嚮 力窮功隳 英

風獨暢 屹屹魯公 不戒于剛 婉變媚嫉 假手

虎狼

公在艱旣

得困之義

有嚴分守

卒遂吾

志

屹屹魯公

風于百世

太山之祜

魯廟翼翼

孰作新之

守令其職

禋祀苾苾

子孫是食

惟廟暨孫

有圯有息

屹屹魯公

與山無極

九世孫溫

右通直郎知沂州費縣事楊

元永立石

右承議郎通判沂州軍州兼管內勸農事雲騎尉

賜緋魚袋常

士溫

右朝散郎知沂州軍州兼內勸農事上輕車都尉賜

緋魚袋借紫梁

彥深

元祐七年四月二十七日建

撰文者爲曹輔案輔字子方華州人登嘉祐八年乙科歷官至朝奉郎守司勳郎中常與蘇黃游見厲樊榭宋詩紀事書碑者秦觀史稱其始登第調定海主簿蔡州教授元祐初除太學博士校正祕書省書籍此碑系銜不列蔡州教授太學博士略之也淮海書世所罕見今玩其筆意瘦勁深得二王遺法碑陰刻

米襄陽記

山左金石志

山左金石志載此文庫作卑菑作災闕作宏非春官氏氏作民尤誤萃編載碑陰仙蹟記未載此碑